

სადაზღვევო კომპანიის ფინანსური მდგრადობის საპიოთხი აბროდაზღვევაში

შორენა ჯადუგიშვილი
სტუ-ს დოქტორანტი

ალექსანდრე სიჭინავა
სტუ-ს პროფესორი

არჩილ ცერცვაძე
სტუ-ს პროფესორი

აბსტრაქტი

სტატიაში განხილულია აგროდაზღვევის მნიშვნელობა სოფლის მეურნეობის ფინანსურ სტაბილურობაში და ბუნებრივი რისკებისგან ფერმერების დაცვაში. ყურადღება გამახვილებულია აგროდაზღვევის როლზე, რომელიც მოიცავს ინდივიდუალური ფერმერის ფინანსურ დაცვას, ინვესტიციების განხორციელებისა და ახალი ტექნოლოგიების დანერგვის მხარდაჭერას, ასევე მთლიან აგროსექტორში ფინანსური სტაბილურობის, სამუშაო ადგილების შენარჩუნებისა და სურსათის უსაფრთხოების უზრუნველყოფას.

სტატია ეხება სადაზღვევო კომპანიების ფინანსურ სიძლიერეს, რომელშიც განსაკუთრებული მნიშვნელობა ენიჭება კაპიტალის ოდენობის მოთხოვნებს, ნეტო ვალდებულებების კონტროლს, გადახდისუნარიანობის მარჟის სწორად გაანგარიშებას, სადაზღვევო რეზერვების ფორმირებას და მათ ეფექტიან ინვესტირებას.

სტატია ასევე შეეხება სუბსიდირებული აგროდაზღვევის სახელმწიფო პროგრამას, რომელიც საქართველოში 2014 წლიდან მოქმედებს და ფარავს ძირითად ბუნებრივ რისკებს, როგორცაა სეტყვა, ჭარბი ნალექი, ქარიშხალი და საშემოდგომო ყინვა. პროგრამის სტატისტიკის მიხედვით, სადაზღვევო კომპანიების აღებული რისკი მნიშვნელოვნად აღემატება მოზიდულ სადაზღვევო პრემიას, რაც ხაზს უსვამს კომპანიების მაღალი ფინანსური სიძლიერის და ეფექტიანი რისკ-მენეჯმენტის აუცილებლობას.

საკვანძო სიტყვები: აგროდაზღვევა, ფერმერის დაცვა, ფინანსური მდგრადობა, კაპიტალი, ნეტო ვალდებულებები, გადახდისუნარიანობის მარჟა, რეზერვები, ინვესტირება, სახელმწიფო სუბსიდია.

FINANCIAL STABILITY OF INSURANCE COMPANIES IN AGRICULTURAL INSURANCE

Shorena Jadugishvili
Phd candidate of GTU
Alexandre Sichinava
Professor of GTU
Archil Tsertsvadze
Professor of GTU

ABSTRACT

The article examines the significance of agricultural insurance in ensuring the financial stability of the agricultural sector and protecting farmers from natural and climatic risks. It emphasizes the multifaceted role of agricultural insurance, which includes safeguarding individual farmers' finances, supporting investments and the adoption of new technologies, promoting financial stability across the entire agricultural sector, preserving jobs, and ensuring food security.

The article focuses on the financial strength of insurance companies, emphasizing the critical importance of minimum capital requirements, control of net obligations, the existence of solvency margins, the formation of insurance reserves, and their effective investment.

The article also addresses the state-subsidized agricultural insurance program in Georgia, which has been in operation since 2014 and covers major natural risks, such as hail, excessive rainfall, storms, and autumn frost. According to program statistics, the risk assumed by insurance companies exceeds the premiums collected, highlighting the necessity for companies to maintain strong financial capacity and implement effective risk management practices.

Keywords: agricultural insurance, farmer protection, financial stability, capital, net obligations, solvency margin, reserves, investment, state subsidy.

ძირითადი ნაწილი

აგროდაზღვევა წარმოადგენს ერთ-ერთ ძირითად ინსტრუმენტს, რომელიც უზრუნველყოფს სოფლის მეურნეობის ფინანსურ სტაბილურობას და ფერმერების დაცვას კლიმატური რისკებისგან. სოფლის მეურნეობა არის სფერო, რომელიც განსაკუთრებულად მოწყვლადია კლიმატური ცვლილებების და სტიქიური მოვლენების მიმართ. თითოეული ასეთი მოვლენა პირდაპირ აისახება მოსავალისა და შემოსავალის ოდენობაზე, რამაც შესაძლოა მნიშვნელოვნად დააზიანოს ფერმერის ფინანსური მდგომარეობა. სწორედ ამ პირობებში მოქმედებს აგროდაზღვევა, რომელიც უზრუნველყოფს ზარალის ნაწილობრივ ან სრულ ანაზღაურებას.

აგროდაზღვევას აქვს მრავალმხრივი როლი, ის თავიდან აცილებს ფერმერს დანაკარგებს და საშუალებას აძლევს განახორციელოს თავისი საქმიანობა უწყვეტად.

აგროდაზღვევა სოფლის მეურნეობაში ასრულებს სტრატეგიულ, სოციალურ და ეკონომიკურ როლს. მისი მთავარი ფუნქციაა ფერმერის დაცვა, სექტორის ფინანსური სტაბილურობა, ინვესტიციების მოზიდვა, ტექნოლოგიური ინოვაციების დანერგვა და სურსათის უსაფრთხოების შენარჩუნება. სოფლის მეურნეობაში, სადაც კლიმატური რისკები მუდმივად არსებობს აგროდაზღვევა წარმოადგენს მნიშვნელოვან ინსტრუმენტს, როგორც ფერმერის, ისე მთლიანი აგრო სექტორის მდგრადობისათვის. ამის გათვალისწინებით, განსაკუთრებული მნიშვნელობა ენიჭება სადაზღვევო კომპანიების ფინანსურ სიძლიერეს, რადგან სისტემის ეფექტიანობა პირდაპირ დამოკიდებულია აღებული სადაზღვევო ვალდებულებების დროულად და სრულად შესრულებაზე.

გადახდისუნარიანობა ასახავს კომპანიის ფინანსური რესურსების საკმარისობას მოსალოდნელი ზარალებისა და მიმდინარე ვალდებულებების დასაფარად. იგი განსაკუთრებულ მნიშვნელობას იძენს, რადგან კომპანია ოპერირებს გაურკვევლობის პირობებში და მისი ფინანსური შედეგები დამოკიდებულია შემთხვევითი მოვლენების სიხშირესა და მასშტაბზე. ფინანსური მდგრადობა უფრო ფართო კატეგორიაა და გულისხმობს სადაზღვევო ორგანიზაციის შესაძლებლობას შეინარჩუნოს სტაბილური ფუნქციონირება გრძელვადიან პერიოდში, მათ შორის მასშტაბური ზარალისა და ბაზრის არასტაბილურობის პირობებში. იგი მოიცავს კაპიტალის ადეკვატურობას, ტექნიკური რეზერვების საკმარისობას და გადაზღვევის სისტემის არსებობას. აგროდაზღვევის შემთხვევაში ფინანსური მდგრადობის შეფასება კიდევ უფრო რთულდება, რადგან რისკები ხშირად იწვევს ფართომასშტაბიან ზარალს. ასეთ პირობებში გადაზღვევის მექანიზმები, რეზერვების საკმარისობა და სახელმწიფო მხარდაჭერის პოლიტიკა მნიშვნელოვან როლს ასრულებს

სისტემის სტაბილურობის შენარჩუნებაში.

სადაზღვევო კომპანიისათვის ფინანსური მდგრადობის უზრუნველსაყოფად, კაპიტალის მინიმალური ოდენობა წარმოადგენს აუცილებელ რეგულაციურ მოთხოვნას, რომელიც უზრუნველყოფს კომპანიის უნარს სრულად და დროულად შეასრულოს დაკისრებული ვალდებულებები. კაპიტალის მინიმალური ოდენობა სადაზღვევო საქმიანობის განხორციელების ყველა ეტაპზე განსაზღვრულია საქართველოს დაზღვევის სახელმწიფო ზედამხედველობის სამსახურის მიერ. სადაზღვევო კომპანიებს სავალდებულო წესით უწყვეტად უნდა ჰქონდეთ განთავსებული შესაბამისი კაპიტალი საბანკო დაწესებულებაში, ხოლო მისი გამოყენება შესაძლებელია, რომელიც შემდგომში კვლავ შეესებულებოდა იქნას. კაპიტალის მინიმალური ოდენობა განსხვავდება დაზღვევის სახეობებისა და ფორმის მიხედვით. ყველა სახეობის განხორციელებისათვის სჭირთა 7,200,000 ლარი, ხოლო მარტო არასიცოცხლის დაზღვევის სახეობების განხორციელებისათვის – 4,800,000 ლარი.

ნეტო ვალდებულებები წარმოადგენს რეალურ სადაზღვევო პასუხისმგებლობას, რომელიც კომპანიას ეკისრება აღებული რისკების ფარგლებში. ნეტო ვალდებულებების ზომის კონტროლი საზედამხედველო კაპიტალთან შესაბამისობაში უზრუნველყოფს სადაზღვევო კომპანიის ფინანსურ მდგრადობას. საქართველოში ერთ რისკზე ნეტო ვალდებულებები არ უნდა აღემატებოდეს საზედამხედველო კაპიტალის 15%-ს.

გადახდისუნარიანობის მარჟა, როგორც ფინანსური „უსაფრთხოების ბუფერი“, უზრუნველყოფს კომპანიის შესაძლებლობას შეასრულოს აღებული ვალდებულებები. მისი გათვლა ეფუძნება სადაზღვევო პრემიის ან ზარალების ანალიზს, წინა წლების ნეტო და ბრუტო ზარალების შედარებას, რაც საშუალებას აძლევს კომპანიას უზრუნველყოს ფინანსური მდგრადობა.

განსაკუთრებულ მნიშვნელობას იძენს სადაზღვევო რეზერვების ფორმირება, რომელიც უზრუნველყოფს მომავალში მოსალოდნელი ვალდებულებების დაფარვას. სავალდებულო რეზერვები მოიცავს გამოუმუშავებელი პრემიის რეზერვს, განცხადებული და დაურეგულირებელი ზარალების, ასევე მომხდარი, მაგრამ განუცხადებელი ზარალების რეზერვს (IBNR). გამოუმუშავებელი პრემიის რეზერვით ხდება პორტფელის მთლიანი რისკების დაფარვა. განცხადებული და დაურეგულირებელი ზარალების რეზერვი ეხმარება კომპანიას ისეთი ზარალების დაფარვაში, რომელიც განაცხადებულია მაგრამ ჯერ არ არის დარეგულირებული, ხოლო IBNR წარმოადგენს რეზერვს, რომელიც მოიცავს მომხდარ, მაგრამ ჯერ განუცხადებელ ზარალებს.

რეზერვების ინვესტირება წარმოადგენს დამატებით სტრატეგიულ ინსტრუმენტს, რომლის საშუალებით კომპანიას შეუძლია განათავსოს რეზერ-

რეგები სხვადასხვა აქტივებში, დივერსიფიკაციის, ლიკვიდურობის, საიმედოობისა და მომგებიანობის პრინციპების გათვალისწინებით. ძირითად საინვესტიციო მიმართულებებს წარმოადგენს ფასიანი ქაღალდები, საბანკო დეპოზიტები, მიმდინარე საბანკო ანგარიშები და უძრავი ქონება.

ნეტო ვალდებულებების კონტროლი, გადახდისუნარიანობის მარჟის არსებობა, რეზერვების ფორმირება და მათი ეფექტიანი ინვესტირება ქმნის სისტემას, რომელიც უზრუნველყოფს სადაზღვევო კომპანიების ფინანსურ მდგრადობას. აგროდაზღვევის შემთხვევაში, როდესაც ბუნებრივი კატასტროფები და კორლაციური რისკები განსაკუთრებით მაღალია, ფინანსური მდგრადობა არის სისტემის ძირითადი გარანტი, რომელიც საშუალებას აძლევს კომპანიებს დაფარონ ზარალი და უზრუნველყონ ფერმერების ფინანსური დაცვა.

საქართველოში სახელმწიფო სუბსიდირებული აგროდაზღვევის პროგრამა 2014 წლიდან ფუნქციონირებს და ფარავს ძირითად ბუნებრივ რისკებს, როგორიცაა სეტყვა, ჭარბი ნალექი, ქარიშხალი და საშემოდგომო ყინვა - მხოლოდ ციტრუსოვანი კულტურებისათვის. პროგრამის სტატისტიკის მიხედვით, სადაზღვევო კომპანიების მიერ აღებული რისკი მნიშვნელოვნად აღემატება მოზიდულ სადაზღვევო პრემიას, რაც ხაზს უსვამს კომპანიის ფინანსური სიძლიერის აუცილებლობას და მაღალი დონის რისკ-მენეჯმენტის საჭიროებას. სწორედ ამიტომ აგროდაზღვევაში ნეტო ვალდებულებების კონტროლი, გადახდისუნარიანობის მარჟის არსებობა, რეზერვების ფორმირება და მათი ეფექტიანი ინვესტირება მნიშვნელოვანია, აღებული ვალდებულებების დროულად და სრულად შესრულებისათვის.


დასკვნა

ამრიგად, აგროდაზღვევა წარმოადგენს მნიშვნელოვან ინსტრუმენტს, რომელიც არა მხოლოდ

ინდივიდუალურად იცავს ფერმერებს ფინანსური ზარალისგან, არამედ უზრუნველყოფს მთლიან სოფლის მეურნეობის სექტორში სტაბილურობას და ინვესტიციების მოზიდვის შესაძლებლობას. აგროდაზღვევის ეფექტიანობა პირდაპირ დამოკიდებულია სადაზღვევო კომპანიების ფინანსურ სიძლიერეზე, რაც მოიცავს საკმარის კაპიტალს, ნეტო ვალდებულებებს, გადახდისუნარიანობის მარჟას, რეზერვების ფორმირებასა და მათი ეფექტიანი ინვესტირებას. აგროდაზღვევის სპეციფიკიდან გამომდინარე, აღნიშნული ფინანსური მექანიზმები წარმოადგენს სისტემის სრულყოფილი მუშაობის ძირითად გარანტს. საბოლოოდ, აგროდაზღვევა არა მხოლოდ ფერმერს აძლევს ფინანსურ დაცვლობას, არამედ ქმნის საფუძველს აგრო სექტორის მდგრადი განვითარებისათვის, რაც ქვეყნის სასურსათო უსაფრთხოების, ეკონომიკური სტაბილურობისა და სოციალური დაცვის მნიშვნელოვანი გარანტია.

გამოყენებული ლიტერატურა:

1. Rural Development Agency –Legal Acts. Accessed <https://www.rda.gov.ge/en/legal/c3433ae9-5cca-425e-84bb-b9b3b10cc091/>
2. Insurance State Supervision Service of Georgia. Accessed https://www.insurance.gov.ge/en/normative_aktebi
3. Statistical data of Georgian Insurers Association.
4. Agro Insurance Program Legal Acts. Accessed www.insurance.gov.ge/files/ShowFiles?id=2dde-1a7e-6b93-402b-a682-240f0fe0b9a6
5. გიგოლაშვილი გ. სადაზღვევო საქმე, თბილისი, 2010 წ.
6. ცერცვაძე ა., ლაშხია შ. აგროდაზღვევის თავისებურებები და განვითარების პერსპექტივები საქართველოში, თბილისი, 2025 წ.



დიაგრამა N1 სადაზღვევო ლიმიტები და პრემიები წლების მიხედვით